



Louis Joseph Raphaël Collin, *Honte*, 1892 *musiche par compagnâ la conte*
prin moviment: jessi. valz.

tal cuchil dal Riul, taponât intal sorc, al cjatave bielstâ copari Vincens. curiôs, furighìn, gjalinâr, i plaseve ogni dì cirî fûr le miôr ande de vite. ben di là dai setante si lecave inmò i lavris gjoldint cun bon estri de nature il misteri. a dî il vêr le sô plee no jere spartide: che le sfrente de scugne no dave francjisie. cundut le balade (si capis, in moreste) i leve di viole: tra une cerce e un taiut al fumave le beche pilucant di plasê. che al fos sul content si viodevilu in muse: svelts i voi e barons un biel pâr di mostaçs. al rideve di gust vent tal ort il cupeç: che i zuiave di gale ogni sclip di bielece.

invidiât di scuindon, pôc di sest in peraule, al gustave le pome, di stagjon in stagjon. nol à fat malegracies che in rivuart al tignive ognidun ogni volte: e tal câs al scuarzeve nome chel che di bon e volevin di lui, sedi vedue par simpri o pôc dome in chel jenfri.

secont moviment: vê. tango.

dut diviers il bon Roman: un biel grop di brâf cristian. possident insin de muse, cule vôs fate, di orcul. lui tignût al jere invezit, salt, onest, lavoradôr: che pal ultin jere vêr, a da jù par chei altris dôî.

ancje lui mai nol diseve nissun no a dibisugne, nome che a l'ocorence, si faseve dâ un acont: a le sclete, di buinore, tant par disduliâsi i gnerfs.

« ... o ai di plantâ patates... » « ven doman ti'n doi un sac ... »

« ... o ai bisugne di fasûi... » « ven doman ti doi i miôr ... di bessole, tor des cinc ». e in te stale cules vacjes, prin di molziles al molç une mari di famee che di meti dongje e veve par chês bocjes il gustà ... e jere propit di bessole.

“se Diu al viôt jo o proviôt ... vevio di mandâ mê fie che a lui i lave miôr? jo o tâs o vai o glot. po cjalant i fruts mangjâ o dîs nome: par vuê o ai fat! doman Signôr fasarâs tu... ”.

lui al leve nome a messe le zornade de salût: che Madone i des inmò robustece par mandâ indenand dure chê tiere! e jere tante a guviernâ...

al pinsîr al suspirave. dut content dal so ben fâ.

detule. mazurche.

no si pues meti judizi cuant che no si à a ce fâ cul pelôs di che puar vivi. Ma par dî une

robate volarès olsâ che almancul di pavee un al cjoleve: il so gjoldi, fasint gjoldi. biel chel altri dut cjapât, al cjapave juste impen, ognidun di fan pal cuel.

vâl a dî ...

che diu-nus-vuardi sei par vuê che un doman
dant cumò il mût di jessi e vê une dì ancje di jentrâ (... ?)

po ... jessi fûr de maluserie, par vê part de biele gjonde ...

e ca ducj a tocjâ len:

sore che inte val-des-lagrimas, nô o vain propit benon ...

finâl. *minuet.*

scjaraçule, maraçule

la lusigne, la craçule ... [1]

di el fari

#239